


Minister Sevinger no ta mira pakico oposicion ta haci tanto fanfaria pa un "dezerzijds akkoord"



ORANJESTAD(AAN): Diaranzon a acerca Minister Benny Sevinger pa puntr'e tocante di un tereno cu e a otorga na Roberto Rincon. Esaki ta algo cu segun oposicion a bay hopi lihe. Sinembargo e mandatario ta expresa cu e fanfaria cu nan a haci rond di e situacion aki ta inecesario y simplemente nan ta haciendo nan trabao

como oposicion, esta di purba trece cosan cu no ta cuadra cu berdad padilanti.

Minister Sevinger di infraestructura a expresa cu su trabao diario ta encera atende cu peticionnan pa tereno pa cas, pa uzo comercial y pa agricultura.

"Un cos mi a siña den e trabao aki, si bo por tuma un

decision n'e momento cu un peticion yega riba bo mesa - p'esey un ciudadano of un empresa ta dirigi su mes cu un carta of un peticion na minister, si bo por tuma e decision eynan tumando background, tumando tur loke bo por tin nan informacion na e momento ey, tum'e!" Sevinger a bisa enfaticamente.

E mandatario a bisa cu si manda e peticion prome pa e diensnan concerni pa conseho e procesonan tur lo bay tarda hopi como cu e diensnan ta bezig cu tanto otro cos.

Loke e minister ta haci, segun e mes ta splica, ta di mira si tin cualkier discrepancia cu ta obvio, si tin cualkier situacion cu no ta cuadra of problema cu ta bisto y cu e informacion cu e tin na e momento ey, e ta pone riba e documento "dezerzijds akkoord", "dezerzijds niet akkoord", "akkoord", "advies" of otro remarca cu ta al caso pa asina e documentonan por sigui nan caminda.

Den e caso di Rincon, e inversionista a inverti placa caba na Aruba. El a cumpra y desaroya un edificio na Balashi y simplemente tabata pidiendo pa extende e tereno di erf-pacht cu un pida mas pa asina e por amplia su negoshi.

Sevinger ta splica cu e mes a "Google" y lesa e informacion basico tocante di Rincon, entre otro cu e ta biba na Merca, e ta envolvi den duna cosnan na deporte, e tin compania estableci na Merca tambe. No tabatin nada sospechoso na prome instancia y no tabatin motibo obvio pa no pone "dezerzijds akkoord" riba e peticion.

E ta agrega cu su "dezerzijds akkoord" no ta decision ni punto final riba e peticion y e mester a bay tur e diensnan cu ta encarga y e proceso ey e documentonan tabata canando.

Minister Sevinger a bisa cu mescos ta aplica ora cu un famia ta acerca su persona y e padushi kier pasa un pida huurgrond pa su nieto pa traha cas. Loke e mandatario ta mira di biaha ta cu si tin con-

flictonan obvio manera destinacion di "natuurgebied" y e ta tuma e decision di biaha.

Den e caso di e famia Arubano, si resulta cu e documento ta cana su caminda y cualkier diens bin ripara cu e tereno tin un rooi ta pasa aden, of tin baranca, etc. e ora e diens ta avisa e minister y e famia ta worde notifica cu finalmente nan no por haci e cambio desea.

Sevinger a comenta cu no tabatin motibo pa bisa di bi-aha cu e no ta di acuerdo pa Rincon haya un pida tereno mas na prome instancia, no tabatin motibo pa e proceso no haya un chens pa cana su caminda.

E minister a añadi cu e departamento cu ta haci investigacion, pues ta bay wak tocante di e tereno comercial, ta pidi carta di banco, raportnan, etc. mester haci su trabao prome cu Rincon worde otorga e opcion riba e tereno. E proceso no a ni yega asina leu, e no tin e opcion, Minister Sevinger a remarca.

Cu su "dezerzijds akkoord" pues, ainda e departamento encarga por a laga sa cu Rincon no ta cualifica of nan no ta confia di unda su placa ta bin pa desaroya e tereno y e no lo haya e opcion tampoco. Sevinger ta lamenta cu oposicion a haci tanto fanfaria tocante di un carta y un simpel "dezerzijds akkoord". Den e ultimo añanan como minister el a firma miles di carta basa riba e informacion cu e tabata na e momento cu e carta ta su dilanti den e ultimo añanan, y e ta para pa e decisionnan cu e ta tuma, el a agrega, y no ta mira pakico oposicion mester haci asina druk.